



**Här Fernand Etgen**  
**President vun der Chamber**

Lëtzebuerg, de 6. Mäerz 2023

Här President,

Esou wéi den Artikel 80 vum Chambersreglement et virgesäit, biede mir Iech, dës parlamentaresch Fro un den Här Minister fir Educatioun, Kanner a Jugend weiderzeleeden.

Laut en engem rezente Presseartikel huet de Ministère fir Educatioun, Kanner a Jugend d'Finanzinspektioun ageschalt fir ze klären, a wéi wäit de „Science Center“ zu Déifferdeng op engem Firmegeflecht baséiert, dat ronderëm säin Direkter opgebaut ass respektiv op dës Persoun zougeschnidden ass.

An deem Kontext wéilte mir folgend Froen un den Här Minister fir Educatioun, Kanner a Jugend riichten:

Spezifesch zu dem beschriwwene Firmegeflecht:


- Zu wéi engem Moment gouf et déi éischt Verdachtsmomenter an Bezuch op d'Gouvernance vum „Science Center“ respektiv d'Firmegeflecht hannendrun?
- Wouranner hunn déi Opfällegkeete bestanen?
- Wéi huet de Ministère reagiert a wien gouf doriwwer informéiert?
- Wéi eng laangfristeg Moossnamen si geplangt, fir d'Gouvernance vum „Science Center“ ze verbessern?
- A wéi wäit hunn déi aktuell Zweiwelen un der Gouvernance en Impakt op de Betrib vum „Science Center“ an op déi zukünfteg Finanzbäihëllefen?

Ganz allgemeng zu der Relatioun tëschent dem „Science Center“ an dem Ministère fir Educatioun, Kanner a Jugend:


- Besteet eng Prozedur, iwwer déi de Ministère d'Notzung vun de Finanzbäihëllefe fir de „Science Center“ kontrolléiert?
  - Wa jo, wéi ginn déi Kontrolle praktesch ëmgesat a vu wien ginn se duerchgefouert?
  - Wann net, firwat net?
- Wien ass responsabel fir d'Zesummesetzung vum Verwaltungsrout vum „Science Center“?

- Wien nennt d'Leit op déi respektiv Posten?

Här President, mir bieden Iech, eisen déifste Respekt unzehuelen.



Diane Aehm  
Deputéiert



Martine Hansen  
Co-Fraktionspresidentin



**Äntwert vum Minister fir Educatioun, Kanner a Jugend, Claude Meisch, op d'parlamentaresch Fro Nr. 7707 vun den honorabelen Deputéierte Martine Hansen an Diane Adehm**

Ech soen den honorabelen Deputéierte Merci fir hir parlamentaresch Fro, déi et erlaabt, eng Rei vu Kloerstellungen a Bezuch op de Luxembourg Science Center ze maachen.

De Ministère fir Educatioun, Kanner a Jugend (MENJE) huet zwou Zorte vu Konventiounen mat der Asbl Luxembourg Science Center – Groussgasmaschinn (LSC). Donieft finanziert de Science Center sech duerch aner öffentlich a privat Gelder an huet och Recetten duerch de Verkaf vun Entréesticketen.

Déi éischt Konventioun betrëfft d'Aktivitéite vum LSC. Hei contribuëiert de MENJE zum Finzement vum Science Center mat enger finanzieller Ënnerstëtzung. Bei der zweeter Zort vu Konventiounen finanziert den Educatiounsministère d'Acquisitioun vun den Experimentalstatiounen, déi am Science Center gewise ginn.

Den Educatiounsministère huet am Fall vu béide Konventiounen an deene vergaangene Joren déi Prozeduren a Kontrollen applizéiert, déi am Fall vun enger Collaboratioun mat enger Asbl am Kader vun enger Konventioun virgesi sinn.

Am Kader vun de Statiounen, déi gebaut goufen, huet de MENJE am Virfeld en Devis vun de Käschte kritt a virum Ausbezuelen am Detail d'Opschlësselung vun den Depensë fir all d'Statiounen iwwerpréift. D'Depensë louchen dobäi am Kader vun deem, wat fir vergläichbar Installatiounen fakturéiert ginn ass. Insgesamt goufen 90 Statioune bezuelt mat engem Gesamtmontant vu 5.464.452 EUR tëschent de Joren 2016 an 2022.

Am Kader vun der Konventioun, déi d'Aktivitéite vum LSC ofdeckt, huet d'Asbl all Joer d'Decompten eragereecht, déi iwwerpréift gi sinn. De Finzement louch am Joer 2022 bei 2.862.500 EUR; an deem Budget sinn 63 % Personalkäschten abegraff.

Um Niveau vum Contrôle vun de Finanze vum LSC kann zeréckbehale ginn, datt d'Depensë vun der Asbl dokumentéiert waren, vun der Asbl justifiéiert goufen an am Verglach mat aneren Aktivitéiten net exagéiert waren.

Parallel dozou huet sech d'Zesummenaarbecht mat der Asbl allerdéngs als schwierig erweisen, well et an der Gestiou un Transparenz a Professionalismus gefeelt huet. Den LSC huet sech iwwer d'Jore reegelméisseg net un d'Prozeduren gehalen, an ass da vun de Servicer vum Educatiounsministère an dem Contrôle financier vum Finanzministère dorop higewise ginn.

Dëst Verhalten huet den Educatiounsministère uganks 2022 dozou beweegt, fir a Gespréicher mat dem LSC iwwer déi zukünfteg Gouvernance vum LSC ze trieden. Konkret ass et dem MENJE dorëms gaangen, am Fall vun engem bedeitende staatlechen Investissement an d'Infrastruktur vum LSC, och déi staatlech Kontroll iwwer d'Aktivitéite sécherzestellen. Och gouf iwwer aner Rechtsforme fir d'Asbl Luxembourg Science Center – Groussgasmaschinn geschwat.

Am September 2022 ass den Educationministère vum engem Member vum Conseil d'administration vum LSC confidentiel kontaktéiert ginn, dee follgend Virwërf erhuewen huet:

- De President vum der Asbl géing sech e Salaire als Direkter vum LSC ausbezuele loossen, iwwer deem de Verwaltungsrot net am Bild war.
- De President géing eng ontransparent Finanzgestioun maachen.
- D'Propriétés intellectuelles vun de Statiounen an Aktivitéite vum LSC géinge weiderhin bei där Sociéitéit leien. Domat wier den LSC strukturell a laangfristeg un déi Sociéitéit gebonnen.
- De Conseil vum der Asbl wier just marginal an de Fonctionnement vum der Asbl agebonnen a wier net genuch um Courant, wat grouss Decisiounen ugeet. D'Membere vum der Asbl géinge praktesch exklusiv aus Persoune bestoen, déi an engem Ofhängegkeetsverhältnis zu dem President vum der Asbl géinge stoen.

Déi erhuewe Virwërf leien um Niveau vum der Gouvernance vum der Asbl a vum der Notzung duerch d'Asbl vun de Ressourcen, déi vun der ëffentlecher Hand zur Verfügung gestallt gi sinn. Béid Elementer ënnerleien der direkter Verantwortung vum Verwaltungsrot vum der Asbl.

Béid Elementer entzéien sech allerdéngs och de Prozeduren déi et beim Staat gëtt, fir de Contrôle vum Aktivitéiten, déi am Kader vu Konventiounen finanzéiert ginn.

Aus dësem Grond huet den Educationministère de Membere vum Verwaltungsrot vum LSC den 10. September 2022 matgedeelt, datt eng weider Zesummenaarbecht nëmmen ënnert follgende Konditiounen méiglech wier:

- Keen Interessenskonflikt méi um Niveau vum President vum Verwaltungsrot.
- Opléise vun de Relatiounen tëscht dem Science Center an der Sociéitéit, déi dem President vum Verwaltungsrot gehéiert.
- Kloerstellen, datt d'Propriétés intellectuelles vun de Konzepter a Statiounen beim Science Center leien.
- Presenz vum Staat an der Gouvernance-Struktur vum Science Center.

De Verwaltungsrot huet sech kuerz duerno schrëftlech un de Ministère adresséiert an e Konstrukt proposéiert, an deem d'Asbl de Besëtzer vum der Sociéitéit gi wier, ouni datt béid Strukturen zesumme gefouert gi wieren, an ouni datt den Interessenskonflikt vum President vum Verwaltungsrot vum LSC opgeléist gi wier.

De Ministère huet op en Neits ënnerstrach, datt kloer an transparent Strukturen sollte geschafe ginn an huet, fir Kloerheet an den Dossier ze kréien, d'Finanzinspektioun via de Finanzministère ageschalt. Enn Dezember ass d'Demande erausgaang, fir déi aktuell Struktur vum LSC ze analyséieren a Propositionen zu der zukünftiger Gouvernance ze maachen. Déi Analys ass den Ament nach amgaang.

Op Basis vun där Analys wäert de Ministère dann decidéieren, ob a wéi eng Moosnamen ze ergräife sinn.

Lëtzebuerg, den 11. Abrëll 2023

De Minister fir Educatioun,  
Kanner a Jugend

(s.) Claude MEISCH